

Vijeće Fakulteta
1. 10. 2024 g.

Komisija za pripremu prijedloga za izbor

VIJEĆU FILOZOFSKOGA FAKULTETA UNIVERZITETA U SARAJEVU

Odlukom Vijeća Filozofskoga fakulteta Univerziteta u Sarajevu br. 02-01/338, od 11. 9. 2024. godine, imenovana je Komisija za pripremu prijedloga za izbor nastavnika u zvanju redovnog profesora za PODRUČJE (OBLAST): *HUMANISTIČKE NAUKE, POLJE: NAUKA O JEZIKU I KNJIŽEVNOSTI (FILOLOGIJA), GRANA: BOSNISTIKA, KROATISTIKA, SRBISTIKA, BOSANSKI, HRVATSKI I SRPSKI JEZIK, Lingvistika* (predmeti: *Uvod u lingvistiku, Pragmalingvistika / IP Pragmalingvistika, IP Umjetni jezici*), *Savremeni (standardni) jezik* (predmeti: *Morfologija I i II, OPĆI PREDMET(I) (Bosanski, Hrvatski, Srpski jezik 1 i 2)* na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu, u sastavu:

1. **prof. dr. Ismail Palić**, doktor lingvističkih nauka, redovni profesor na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu na naučnoj oblasti *bosanski, hrvatski i srpski jezik*, predsjednik;
2. **prof. dr. Lejla Nakaš**, doktor lingvističkih nauka, redovna profesorica na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu na naučnoj oblasti *BOSANSKI, HRVATSKI I SRPSKI JEZIK, Historija jezika* (predmeti: *Staroslavenski jezik, Historija književnog jezika I i II, Uvod u slavistiku, IP Jezik sevdalinke, IP Jezičke odlike balade o Hasanaginici*), član;
3. **prof. dr. Josip Baotić**, doktor filoloških nauka, profesor emeritus na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu na predmetima *Savremeni srpskohrvatski–hrvatskosrpski jezik i Opšta lingvistika*, član.

Dana 12. 9. 2024. godine Komisija je zaprimila akt Filozofskoga fakulteta Univerziteta u Sarajevu br. 03-02/676, od 12. 9. 2024, kojim joj se dostavlja kompletan konkursni materijal s prijavom kandidata i izvještaj Službe za pravne, personalne i opće poslove sačinjen nakon obrade prijave. Spomenutim aktom Filozofskoga fakulteta Komisija je obaviještena da se na konkurs koji je, u skladu s Odlukom Vijeća Fakulteta br. 02-01/273, od 3. 7. 2024, bio objavljen na veb-stranici Univerziteta u Sarajevu i Filozofskoga fakulteta te u dnevnom listu „Dnevni avaz“ dana 20. 7. 2024, a zaključen dana 4. 8. 2024. prijavio jedan kandidat, i to dr. Halid Bulić. U izvještaju Službe za pravne, personalne i opće poslove sačinjenom nakon obrade prispjele prijave na konkurs konstatira se da je kandidat dr. Halid Bulić svoju prijavu s dokumentima blagovremeno dostavio poštom 31. 7. 2024. godine. U spomenutom izvještaju navodi se cjelovit popis dokumentacije i materijala dostavljenih uz prijavu kandidata. Na sastanku Komisije održanom 11. 9. 2024. godine, kojem su fizički prisustvovali svi članovi Komisije te predstavnici Službe za pravne, personalne i opće poslove, otvorena je pristigla prijava na konkurs te je utvrđeno da je spomenuta prijava kandidata dr. Halida Bulića pravovremena i potpuna. U skladu sa Zaključkom Senata Univerziteta u Sarajevu br. 01-13-19/24, od 17. 7. 2024. godine (djelovodni broj Fakulteta 02-01/316, od 19. 7. 2024. godine) rokovi propisani Zakonom o visokom obrazovanju u postupku predmetnog izbora

mirovali su u periodu korištenja kolektivnog godišnjeg odmora (od 22. 7. 2024. do 25. 8. 2024. godine).

Komisija je pregledala te pažljivo i detaljno analizirala cjelokupni zaprimljeni materijal, pa Vijeću Filozofskoga fakulteta podnosi sljedeći

I Z V J E Š T A J s prijedlogom odluke o izboru

Nakon detaljnog uvida u dokumentaciju i materijale koje je kandidat dr. Halid Bulić dostavio u svojoj prijavi Komisija je utvrdila sljedeće:

Dr. Halid Bulić u svojoj prijavi naveo je da se prijavljuje za izbor u zvanje **redovnog profesora** za PODRUČJE (OBLAST): *HUMANISTIČKE NAUKE, POLJE: NAUKA O JEZIKU I KNJIŽEVNOSTI (FILOLOGIJA), GRANA: BOSNISTIKA, KROATISTIKA, SRBISTIKA, BOSANSKI, HRVATSKI I SRPSKI JEZIK, Lingvistika* (predmeti: *Uvod u lingvistiku, Pragmalingvistika / IP Pragmalingvistika, IP Umjetni jezici*), *Savremeni (standardni) jezik* (predmeti: *Morfologija I i II*), *OPĆI PREDMET(I) (Bosanski, Hrvatski, Srpski jezik I i 2)* na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu, što potpuno odgovara predmetu raspisanog konkursa.

Iz priložene dokumentacije Komisija je o kandidatu dr. Halidu Buliću utvrdila sljedeće:

I. BIOGRAFIJA

Dr. Halid Bulić rođen je _____ u Tuzli. Osnovnu školu završio je u Gračanici kod Živinica, a opću gimnaziju u Mješovitoj srednjoj školi u Živinicama. Od 2004/05. do 2007/08. akademske godine bio je student na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu. Diplomirao je 9. 10. 2008. godine ocjenom deset (10) i stekao zvanje *profesora bosanskog, hrvatskog, srpskog jezika i književnosti naroda Bosne i Hercegovine*, s ukupnim prosječkom ocjena 9,68. Tema njegovog diplomskog rada bila je *Tipovi supstantivnih dopuna glagolima u bosanskom jeziku*. Dobitnik je plakete Filozofskoga fakulteta u Sarajevu za izvanredne rezultate postignute tokom studija.

Za vrijeme studija dva je puta bio na usavršavanju u inozemstvu. Od aprila do jula 2007. godine boravio je na Institutu za slavistiku Univerziteta u Würzburgu kao stipendist tog univerziteta i DAAD-a. U periodu od 29. 7. 2007. do 18. 8. 2007. boravio je na Univerzitetu u Innsbrucku, gdje je završio ljetni kurs *Innsbrucker Hochschulkurse Deutsch (IHD)*. Osim toga od januara do juna 2024. godine pohađao je univerzitetski kurs esperanta "Lingva precizeco" na Jagielonskom univerzitetu u Krakowu.

Na Postdiplomskom studiju iz lingvističkih disciplina na Filozofskom fakultetu Univerziteta u Sarajevu položio je sve ispite s prosječnom ocjenom 10. Magistarski rad *Glagolske sintagme s adverbijalnim dopunama u bosanskom jeziku* odbranio je 23. 8. 2010. Na istom je fakultetu 19. 6. 2013. godine odbranio doktorsku disertaciju *Veznici u savremenom bosanskom jeziku*.

Od maja 2009. do maja 2013. bio je asistent za užu naučnu oblast *lingvistika* na Filozofskom fakultetu Univerziteta u Tuzli. Od decembra 2013. do novembra 2018. godine radio je kao docent za užu naučnu oblast *lingvistika* na Odsjeku za bosanski, hrvatski i srpski jezik Filozofskog fakulteta Univerziteta u Sarajevu. U novembru 2018. godine izabran je u zvanje

vanrednog profesora za uže naučne oblasti lingvistika i savremeni (standardni) jezik. Na Filozofskom fakultetu Univerziteta u Sarajevu predaje na prvom i drugom ciklusu studija te na Doktorskom studiju lingvističke bosnistike.

Dr. Halid Bulić predsjednik je Instituta za bosanski jezik i književnost u Tuzli te urednik magazina za jezik i književnost *Lingvazin* (ISSN 2303-4831). Uređivao je i naučni časopis *Bosnistika plus* (ISSN 2303-5285). Od 2014. godine član je redakcije zbornika radova *Sarajevski filološki susreti* (ISSN 2233-1018). Od 2021. godine član je redakcija časopisa *Pismo* (ISSN 1512-9357) i *Književni jezik* (ISSN 0350-3496), a tokom 2022. godine bio je član redakcije *Radova Filozofskog fakulteta u Sarajevu* (ISSN 2303-6990). Član je međunarodnih naučnih lingvističkih udruženja *Slavic Linguistic Society* i *Societas Linguistica Europaea* te dopisni član Bosanskohercegovačko-američke akademije nauka i umjetnosti (BHAAAS).

Na Filozofskom fakultetu u Sarajevu u raznim periodima povjeravana su mu različita administrativna i upravna zaduženja. Između ostaloga bio je voditelj Centra za bosanski, hrvatski i srpski jezik pri Centru NIRSA Filozofskoga fakulteta (od januara 2021. do augusta 2022. godine), a trenutno je voditelj Odsjeka za bosanski, hrvatski i srpski jezik (od februara 2024. godine).

Dr. Halid Bulić bavi se i književnoumjetničkim radom za koji je dobio više domaćih i međunarodnih nagrada.

Govori engleski i slovenski jezik, služi se njemačkim, a elementarno poznaje talijanski i esperanto.

II. BIBLIOGRAFIJA

Iz područja lingvističke bosnistike dr. Halid Bulić dosad je objavio sedam autorskih knjiga, dvije knjige u koautorstvu, više od četrdeset naučnih radova te tridesetak stručnih radova. Komisija je uzela u razmatranje samo relevantne bibliografske jedinice objavljene nakon izbora u zvanje vanrednog profesora.

Nakon izbora u zvanje vanrednog profesora (2018) dr. Halid Bulić objavio je šest knjiga i petnaest naučnih radova, kako slijedi:

I. knjige

1. *Pragmatika* (u koautorstvu sa Sabinom Bakšić), Bookline, Sarajevo, 2019, 304 str.
2. *Nove teme iz lingvističke bosnistike*, Institut za bosanski jezik i književnost u Tuzli, Tuzla, 2019, 274 str.
3. *Veznici u savremenom bosanskom jeziku*, Filozofski fakultet Univerziteta u Sarajevu, Sarajevo, 2021, 384 str.
4. *Sarajevski korpus SMS poruka na bosanskom jeziku / The Sarajevo Corpus of SMS Messages in Bosnian* (u koautorstvu s Elmom Durmišević, Azrom Hodžić-Čavkić, Enisom Bajraktarević, Azrom Ahmetpahić-Peljto i Belminom Šabićem), Univerzitet u Sarajevu – Filozofski fakultet, Sarajevo, 2023, xxxvi + 2500 str. (e-knjiga)
5. *Na marginama leksikografije i gramatike*, Institut za bosanski jezik i književnost u Tuzli, Tuzla, 2024, 208 str.
6. *Uzvicu u savremenom bosanskom jeziku*, Institut za bosanski jezik i književnost u Tuzli, Tuzla, 2024, 174 str.

II. naučni radovi

1. "Upotreba deiktičkih riječi *taj, ta, to* u nekim djelima Alije Isakovića", *Alija Isaković i bosanski jezik: Zbornik radova*, Institut za jezik Univerziteta u Sarajevu, Sarajevo, 2018, 263–279.
2. "Odnos veznika i riječca u bosanskom jeziku", *Pismo* XVII/1, Bosansko filološko društvo, Sarajevo, 2018, 31–58.
3. "Riječi *volja, čas* i *mjesto* između imenica i veznika", *Radovi Filozofskog fakulteta u Sarajevu* XXII, Filozofski fakultet Univerziteta u Sarajevu, Sarajevo, 2019, 35–47.
4. "Prosti priložni junktori u bosanskom jeziku", *Fluminensia* 31/2, Rijeka, 2019, 221–247.
5. "Razvoj mevluda na bosanskom jeziku", *Takvim* za 2020. godinu, Kalem, Sarajevo, 2019, 139–152.
6. "O složenosti veznika u bosanskom jeziku", *Bosanski jezik* 16, Filozofski fakultet Univerziteta u Tuzli, Tuzla, 2019, 9–27.
7. "Alternativna leksikografija i antirječnici u Bosni i Hercegovini", *DHS* 1 (10), Filozofski fakultet Univerziteta u Tuzli, Tuzla, 2020, 47–70.
8. "Značenja sufiksa *-suz* u bosanskom jeziku", *Rasprave: Časopis Instituta za hrvatski jezik i jezikoslovlje* 46/1, Institut za hrvatski jezik i jezikoslovlje, Zagreb, 2020, 49–61.
9. "Dvostruki distali *anamon* i *anamonaj* i srodni izrazi u bosanskom jeziku", *Fluminensia* 34/1, Rijeka, 2022, 51–94.
10. "Čestice bosanskog jezika i gramatička kategorija lica", *Sarajevski filološki susreti 6: Zbornik radova (knjiga I)*, Bosansko filološko društvo, Sarajevo, 2022, 86–107.
11. "Umjetni jezici u Bosni i Hercegovini", *Pismo* XX/1, Bosansko filološko društvo, Sarajevo, 2022, 9–34.
12. "Elementi pučke pragmatike u bosanskim poslovicama", *Poznańskie Studia Slawistyczne* 24 (2023), 235–251.
13. "Žargon učenika bosanskohercegovačkih medresa", *Fluminensia* 35/1, 2023, 153–169.
14. "Pragmatičke vrijednosti ponavljanja grafema u SMS porukama na bosanskom jeziku", *Zbornik radova u znak sjećanja na kolegicu Almu Granov*, Univerzitet u Sarajevu – Filozofski fakultet, Sarajevo, 2024, 73–94.
15. "Skrćenice u SMS porukama na bosanskom jeziku", *DHS* 1 (25), Filozofski fakultet Univerziteta u Tuzli, Tuzla, 2024, 301–321.

Kratki opis i ocjena bibliografije relevantne za izbor

Na osnovu priložene bibliografije koja je relevantna za izbor može se zaključiti da se dr. Halid Bulić naučno bavi dominantno pitanjima iz oblasti savremenoga bosanskog, hrvatskog i srpskog jezika, ponajprije onima iz domena gramatike, pragmatike, stilistike, leksikografije, ali da ga uz to također zanimaju i pitanja koja se tiču općenito lingvistike.

S obzirom na to da bibliografija dr. Halida Bulića koja je relevantna za izbor brojem jedinica višestruko premašuje zahtjeve definirane zakonskim odredbama o minimalnim uvjetima za izbor u zvanje redovnog profesora (što je činjenica koju Komisija s velikim zadovoljstvom posebno ističe), ovdje ćemo, iz razumljivih razloga, iznijeti ocjenu samo dijela gore navedenih bibliografskih jedinica, i to dviju knjiga i jedanaest naučnih radova (prema izboru Komisije), što

predstavlja zakonski minimum u pogledu potrebnog broja objavljenih radova i knjiga (tri su naučna rada dodana s obzirom na to da njima kandidat zamjenjuje mentorstvo na trećem ciklusu studija).

1. Knjige

1.1.

Knjiga *Veznici u savremenom bosanskom jeziku* (bibliografska jedinica ovdje označena kao I. knjige pod rednim brojem 3) naučna je monografija koja predstavlja djelimično izmijenjenu verziju teksta doktorske disertacije koju je kandidat odbranio na Filozofskom fakultetu u Sarajevu 2013. godine. Knjiga se sastoji od uvoda, dva poglavlja u pristupnom dijelu, dva poglavlja u glavnom dijelu, zaključka te popisa izvora i literature.

U uvodnom dijelu (str. 9–10) autor definira problem istraživanja, navodi motive, zadatke i ciljeve istraživanja, objašnjava teorijsko-metodološki pristup te postavlja glavne hipoteze.

U prvom od dva poglavlja u pristupnom dijelu knjige (str. 11–21) autor se bavi određenjem osnovnih (ključnih) pojmova i termina među kojima je svakako središnji „veznik“. Ukazuje se na različite definicije i interpretacije toga pojma i termina u deskriptivnim novoštokavskim gramatikama i drugoj literaturi. Zbog velike neujednačenosti koja u tom pogledu postoji u južnoslavističkoj literaturi (pa i šire) autor se opredjeljuje da koristi termin „junktori“ te objašnjava u kakvoj relaciji taj termin stoji prema terminu „veznici“.

U drugom pristupnom poglavlju (*Dosadašnji opisi veznika*; str. 23–28) autor izlaže historijat problema, odnosno donosi pregled i kritičku analizu opisa veznika u dvadesetak novoštokavskih gramatika.

Prvo poglavlje glavnog dijela knjige (*Odnos veznika i drugih vrsta riječi* (str. 29–211) posvećeno je relacijama u kojima veznici stoje s ostalim leksičkim kategorijama. Detaljno se u posebnim odjeljcima analizira odnos veznika i imenica, veznika i glagola, veznika i zamjenica, veznika i priloga, veznika i uzvika, veznika i prijedloga te veznika i riječca. Ovo se poglavlje završava još dvama odjeljcima posvećenim pitanju složenosti veznika te zaključnim stavovima o veznicima kao vrsti riječi. Autorovo razmatranje u ovome dijelu odlikuje se vrlo značajnim zapažanjima, nalazima i spoznajama koje u velikoj mjeri doprinose boljem razumijevanju i primjerenijem opisu ne samo veznika nego i svih drugih vrsta riječi s kojima oni stoje u nekoj vrsti relacije.

I drugo poglavlje glavnog dijela knjige (*Junktori*; str. 213–318) također je vrlo obimno. U njemu se pažnja usredotočuje na junktore i njihove vrste. Ovo je poglavlje podijeljeno na četiri odjeljka od kojih dva imaju i pododjeljke. Najprije se opisuju funkcije junktora u rečenici, a zatim odnosi između konjunktora i subjunktora. Konjunktori se dalje analiziraju raslojavanjem na proste i složene, a tako i subjunktori. Među prostim subjunktorima izdvajaju se i opisuju veznički, zamjениčki i priložni, a među složenima – složeni subjunktori tipa *glagol + veznik*, složeni subjunktori tipa *prijedlog + veznik*, složeni subjunktori tipa *prijedlog + imenica + veznik*, složeni subjunktori tipa *prilog (priloški izraz) + veznik*, složeni subjunktori tipa *riječca + veznik*, složeni subjunktori tipa *veznik + riječca*, složeni subjunktori tipa *riječca + zamjenica*, složeni subjunktori tipa *zamjenica + riječca*, složeni subjunktori tipa *riječca + prilog* i složeni subjunktori tipa *prilog + riječca*. I ovdje se razmatranje odlikuje empirijskom podlogom (iz izvora), velikom sistematičnošću te značajnim generalizacijama.

U zaključku autor sumira rezultate istraživanja. Popis izvora sadrži više od trideset jedinica, a popis literature blizu sto četrdeset jedinica.

Zaključno se može kazati da ova knjiga pruža izuzetno velik naučni doprinos opisu veznika u bosanskom jeziku, a time i općenito opisu gramatičkog sistema toga jezika. Autorova razmatranja, analize, nalazi i zaključci u ogromnoj mjeri proširuju dosadašnje spoznaje o predmetu istraživanja te otvaraju nove vidike i perspektive za buduća istraživanja. U tom je smislu značaj ove knjige iznimno velik.

1.2.

Knjiga *Uzvici u savremenom bosanskom jeziku* (bibliografska jedinica ovdje označena kao I. knjige pod rednim brojem 6) posvećena je uzvicima kao vrsti riječi u bosnistici i općenito u južnoj slavistici.

Osim uvoda i zaključka, ovu knjigu čini šest tematskih poglavlja, i to: *Historija opisivanja uzvika*, *Opisivanje uzvika u bosnistici i susjednim filologijama*, *Uzvici kao vrsta riječi*, *Odnos uzvika i drugih vrsta riječi*, *Sintaksa uzvika* i *Klasificiranje uzvika*. Knjizi je također pridodan dio pod naslovom *Prilog leksikografskoj obradi uzvika* (rječnički obrađen popis uzvika) zatim popisi izvora i literature, imenski i predmetni registar, sažetak na bosanskom i engleskom jeziku te podaci o autoru.

U uvodnom dijelu autor obrazlaže motive rada, ističući da mu je cilj „predstaviti uzvike kao vrstu riječi, opisati njihove osobine i vrste, definirati nejasne granice prema drugim vrstama riječi, preispitati njihovo sintaksičko vladanje te ponuditi njihov opsežan popis zasnovan na gramatičkoj literaturi i analizi korpusa, uz opis potvrđenih značenja i upotreba uzvika prepoznatih u korpusu“.

U prvom tematskom poglavlju predstavlja se historijat istraživanja uzvika u lingvistici, a u drugom poglavlju autor se fokusira na istraživanja uzvika u bosnistici i ostalim južnoslavističkim filologijama.

Trećim tematskim poglavljem započinje glavni (analitički) dio ove knjige; u njemu se općenito raspravlja o uzvicima kao vrsti riječi kroz elaboraciju pitanja kao što su: jesu li uzvici dio jezika, odnosno jezički znakovi, kakva su oni vrsta riječi, šta su tačno uzvici i u kakvoj relaciji stoje prema pojmovima i terminima kao što su usklik (eksklamacija, eksklamativna konstrukcija), ideofon, onomatopeja, formula, poštapalica, invektiv. Sljedeće poglavlje u okviru glavne rasprave posvećeno je odnosu uzvika i drugih vrsta riječi; u njemu se razmatraju relacije u kojima uzvici stoje prema imenicama, glagolima, pridjevima, zamjenicama, priložima, veznicima i česticama. Glavni dio završava se još dvama poglavljima – jednim u kojem se raspravlja o sintaksi uzvika i drugim gdje se nudi klasifikacija uzvika.

U zaključku autor daje pregled rezultata istraživanja, a popisi izvora i literature donose velik broj jedinica.

Komisija zaključuje kako je problem kojim se autor bavio u ovoj knjizi naučno relevantan i nedovoljno istražen. Autor je dobro definirao ključne pojmove i odabrao sasvim primjeren teorijsko-metodološki pristup. Pokazao je iznimno dobru obaviještenost o historijatu problema i dosadašnjim istraživanjima te je koristio relevantnu naučnu literaturu. Razmatranje problema utemeljeno je na odgovarajućoj empirijskoj podlozi koja sasvim odgovara postavljenim zadacima i ciljevima. Rasprava je dobro zasnovana i logična, a zaključci jasni i pouzdani. Spoznaje i rezultati koji su prezentirani u ovoj knjizi dosad nisu bili poznati u obliku u kojem se ovdje navode, tako da ona predstavlja značajan naučni doprinos. Imajući u vidu obim rukopisa, korištenu naučnu metodologiju, tematiku rukopisa te širinu i dubinu analitičkog postupka, Komisija zaključuje da se radi o naučnoj monografiji. Komisija zaključno ističe da ova knjiga značajno obogaćuje lingvističku bosnistiku, posebno zato što se bavi pitanjima koja su u njoj sasvim neopravdano zapostavljena i na njih nudi vrlo argumentirane i uvjerljive odgovore. Zato će ona biti nezaobilazan izvor u svim budućim istraživanjima i opisima vrsta riječi (posebno uzvika) u bosanskom jeziku.

2. Radovi

Komisija zaključuje da svih petnaest radova (bibliografske jedinice ovdje označene kao II. naučni radovi) koje je autor objavio nakon izbora u zvanje vanrednog profesora (2018) spada u kategoriju naučnih radova. Velika većina njih objavljena je u relevantnim i priznatim publikacijama koje su registrirane u indeksiranim bibliografskim bazama. Kako je ranije navedeno, ovdje se kratko predstavlja jedanaest radova: najprije osam onih koji predstavljaju ispunjenje najmanjeg broja potrebnog za izbor u zvanje redovnog profesora, a zatim tri rada kojima se zamjenjuje mentorstvo na trećem ciklusu studija (uvjet za izbor koji kandidat nije ispunio).

2.1.

U radu “Upotreba deiktičkih riječi *taj, ta, to* u nekim djelima Alije Isakovića” (bibliografska jedinica ovdje označena kao II. naučni radovi pod rednim brojem 1) analizira se upotreba deiktičkih riječi *taj, ta* i *to* u pričama *Taj čovjek, Ta priča* i *To nastojanje* te u drami *To bosanskohercegovačkog književnika Alije Isakovića*. Budući da su oblici tih riječi istaknuti u naslovima, analiza počinje od pretpostavke da će te riječi imati značajnu ulogu i u tekstu djela. Pokazano je da su te upotrebe raznovrsne, ali ne doprinose uvijek jednako kvalitetu književnog teksta i književnosti kao načinu komunikacije između autora i čitalaca. Stilistički i literarnopragmatički potencijal riječi *taj, ta, to* najbolje je iskorišten u priči *Taj čovjek*, u kojoj te riječi imaju veliku frekvenciju i doprinose ritmizaciji, izražajnosti, oneobičavanju i upravljanju glasovima. Riječi *taj, ta, to* imaju raznovrsne upotrebe i u drami *To*, ali za ovaj je rad najvažnija njihova upotreba za označavanje završetka dijaloga, naglašavanje zaključaka i poente, zatim za dodavanje nostalgичne nijanse iskazima likova te isticanje ljutnje, bijesa ili doživljenosti određenih osjeta i utisaka. U priči *Ta priča* potencijal riječi *taj, ta, to* iskorišten je znatno manje, a u priči *To nastojanje* njihova je upotreba skoro zanemariva (samo četiri pojave) pa autor smatra da je jedino opravdanje da se u naslovu priče pojavi riječ *to* – manir.

2.2.

U radu “Odnos veznika i riječca u bosanskom jeziku” (bibliografska jedinica ovdje označena kao II. naučni radovi pod rednim brojem 2) razmatraju se riječi o čijoj pripadnosti veznicima ili riječcama u literaturi postoje nejasnoće. Najprije je razmotrena kategorijalna pripadnost riječi *i, ni, niti, ili, bilo, ha* i *(h)em*, koje se mogu pojavljivati ispred svih jedinica u nabrojanju, uključujući i prvu. Zaključeno je da su navedene riječi veznici u svim slučajevima, osim kada stoje ispred prvog koordinanda. U tom slučaju su riječce. Riječi *dakle, samo, jedino* i *tek*, koje se u literaturi često smatraju veznicima zaključnih i isključnih klauza, svrstane su u riječce. Njihova pripadnost riječcama najbolje se dokazuje njihovom distribucijom, koja je mnogo slobodnija nego distribucija koordinacijskih veznika. Distribucijom je dokazano i da su riječi *i* i *ni* kao drugi član u konstrukcijama poput *pa i, pa ni, te i, te ni, a i, ali i* i sl. riječce, dok su prvi članovi konstrukcija uvijek veznici. Također je pokazano da riječ *po* nikad nije veznik. Ona se u nekim slučajevima svrstava u prijedloge, a u nekim u riječce. Riječ *kao* smatra se riječcom u svim kontekstima. Ta čestica može biti sastavni dio složenih junktora *kao da, kao što, kao kad* i sl. U vezi s riječju *neka*, koja se u literaturi smatra u nekim slučajevima riječcom, a u nekima veznikom, utvrđeno je da je uvijek riječca. Riječ *li* ponaša se različito u različitim vrstama zavisnih klauza. U zavisnoupitnim klauzama je riječca, a u namjernim i pogodbenim klauzama riječ *li* je veznik. U namjernim klauzama ostvaruje se u sastavu složenog diskontinuiranog junktora *ne... li*.

2.3.

U radu "Riječi *volja*, *čas* i *mjesto* između imenica i veznika" (bibliografska jedinica ovdje označena kao II. naučni radovi pod rednim brojem 3) opisano je sintaksičko ponašanje navedenih riječi, koje su prvenstveno imenice, ali im se nekad u literaturi pripisuje i pripadnost veznicima, bar u nekim konstrukcijama. Dokazano je da navedene riječi nikad nisu veznici. Riječ *volja* uvijek je imenica, kao i riječ *čas*. U konstrukcijama u kojima se te riječi u literaturi proglašavaju veznicima, mogu se upotrijebiti i druge riječi sličnog značenja, naprimjer, *želja* (umjesto *volja*) ili *minuta*, *sekunda* (umjesto *čas*), što dodatno potvrđuje da su u tim konstrukcijama riječi *volja* i *čas* imenice. Što se tiče riječi *mjesto*, ni ona nikad nije veznik, ali može biti prijedlog. Kao prijedlog sinonimna je riječima *umjesto* i *namjesto*, dok imenica *mjesto* nema takve sinonime.

2.4.

U radu "Razvoj mevluda na bosanskom jeziku" (bibliografska jedinica ovdje označena kao II. naučni radovi pod rednim brojem 5) predstavljen je razvoj mevluda kao žanra te popis dosadašnjih mevluda na bosanskom jeziku. Pokazano je da u ranijim popisima mevluda ima i manjka i viška: manjka, jer su se pojavili novi mevludi, a viška, jer neki tekstovi koji se spominju više nisu dostupni nauci, nisu mevludi ili su ustvari prijepisi nekog drugog mevluda. Autor navodi sljedeće autore za koje ranija literatura tvrdi da su napisali mevludske spjeveve na bosanskom jeziku: Salih Gašević, Musa Ćazim Ćatić, Arif Sarajlija Brkanić, Safvet-beg Bašagić, Seid Zenunović, Muhamed Spužić, Muharemaga Dizdarević (poznat kao Muhamed Rušdi, napisao dva mevluda), Nazif Šušević, Mahmud Džaferović, Ali b. Abdullah Ali Bosnavi, Tahir Popov, Šemsudin Sarajlić, Hamdi ef. Sirćo, Vehbija Hodžić, Rešad Kadić, Ešref Kovačević, Mehmed Mahmutović, Ismail Selimović, Ibrahim Proho, Husnija Suša, Seid Aščić, Mustafa Jelovac, Meho Hasanović, Esad Bajić i Džemaludin Latić. Potom kratko komentira djela koja se spominju kao mevludi, ističući koji od njih zaista jesu mevludi, a koje treba uvrstiti u neki drugi žanr. Istaknuto je da mevlud kao žanr još ima mnogo potencijala za razvoj i na bosanskom jeziku nije ostvario najveće domete. Taj razvoj zaslužuje kontinuirano praćenje, promociju i književnoznanstvenu deskripciju i evaluaciju, jer je mevlud mnogo više od povremenog događaja i mnogo više od vjerske književnosti.

2.5.

Rad "O složenosti veznika u bosanskom jeziku" (bibliografska jedinica ovdje označena kao II. naučni radovi pod rednim brojem 6) bavi se pitanjem strukturnog sastava veznika. U gramatičkoj literaturi koja se bavi složenim rečenicama i jedinicama kojima se povezuju uvijek se spominje ili implicira da funkciju povezivanja klauza u složenoj rečenici mogu vršiti i složene jedinice sastavljene od više riječi ili jedinica koje se mogu prepoznati kao nezavisne riječi barem u nekim kontekstima. Postojanje takvih složenih jedinica nameće teorijsko pitanje u šta ih treba svrstati. Odgovori na to pitanje često zavise od drugih složenih teorijskih pitanja, naprimjer, kako je definirana "riječ" ili gdje je granica između riječi i sintagme. Stavovi navedeni ili implicirani u literaturi različiti su i često se zasnivaju na terminima kao što su *veznička skupina*, *veznički spoj*, *složeni junktor*, *složeni veznik* itd. U ovom radu prihvaćeno je razlikovanje između *veznika* kao vrste riječi i *junktora* kao dijelova rečenice koji imaju ulogu povezivanja. To implicira gledište da su veznici uvijek riječi, a junktori mogu biti sastavljeni od više riječi. Za razlikovanje riječi od spoja više riječi, razmotreni su kriteriji pokretljivosti, neprekidnosti i unutrašnje stabilnosti. Primjena tih kriterija dovode do zaključka da su izrazi (junktori) *budući da*, *osim što*, *tako da*, *taman da*, *ne... li*, *kao da* nisu riječi, već kompleksi od više riječi i ne mogu se smatrati veznicima.

S druge strane, pokazano je da je junktor *to jest*, iako sadrži dvije pravopisne riječi, ipak jedna gramatička riječ. Nakon analize, zaključeno je da *junktori* (kao sintaktičke jedinice) mogu biti prosti (jedna riječ) i složeni (više riječi). Međutim, *veznici*, gramatički gledano, uvijek se sastoje od jedne riječi i nema opravdanja za izdvajanje kategorije *složenih veznika* u bosanskom jeziku.

2.6.

U radu “Alternativna leksikografija i antirječnici u Bosni i Hercegovini” (bibliografska jedinica ovdje označena kao II. naučni radovi pod rednim brojem 7) govori se o alternativnoj leksikografiji u Bosni i Hercegovini, njenom savremenom stanju i oblicima u kojima se ostvaruje. Riječ je o tekstovima, tačnije popisima riječi koji se predstavljaju kao rječnici, ali u kojima se definicije, odnosno opisi značenja i upotrebe pojedinih izraza po stilu ili sadržaju umnogome razlikuju od definicija kakve su prisutne u konvencionalnoj leksikografiji. Najveći domet alternativne leksikografije u Bosni i Hercegovini predstavljaju tri veća popisa koji su objavljeni kao zasebna knjiga ili kao samostalno veće poglavlje u knjizi. To su *Seksikon* Nenada Veličkovića, *Rječnik zapretanih riječi i izraza u bosanskom jeziku* Muhidina Šarića i *Ero Gag: Mala zbirka hercegovačkog žargona* nepoznate grupe autora. Predstavljani se rječnici međusobno razlikuju po formi, sadržaju, stilu i veličini, tako da omogućavaju dobar uvid u mogućnosti koje imaju djela alternativne leksikografije.

2.7.

Rad “Značenja sufiksa *-suz* u bosanskom jeziku” (bibliografska jedinica ovdje označena kao II. naučni radovi pod rednim brojem 8) bavi se pitanjem pomjeranja značenja leksema koje sadrže sufiks *-suz*. Među riječima koje su u bosanski jezik došle iz turskog jezika mnogo je onih koje su tvorene sufiksom *-suz*. Osnovno značenje sufiksa *-suz* u turskom jeziku je ‘bez’, odnosno ‘odsustvo onoga što je iskazano osnovom riječi’. Ono se obično zadržava i u posuđenicama u bosanskom jeziku. Međutim, istraživanje pokazuje da to nije uvijek tako. U savremenom bosanskom jeziku postoji više riječi u kojima sufiks *-suz* ima značenje drukčije od izvornog, odnosno u kojima ne označava odsustvo ili nedostatak onoga što je kazano osnovom riječi. Većina posuđenica iz turskog u bosanski jezik koje se završavaju sufiksom *-suz* označavaju odsustvo nečeg što je dobro i poželjno pa označavaju negativne pojave. Zbog toga je novo značenje sufiksa *-suz* ‘nosilac loše osobine’. Takvo je značenje prisutno u riječima *hatèrsuz*, *belàjsuz*, *problémsuz*, *drvènsuz*, *harámsuz*, *beznařàksuz* i *bezbismilèszuz*.

2.8.

U radu “Čestice bosanskog jezika i gramatička kategorija lica” (bibliografska jedinica ovdje označena kao II. naučni radovi pod rednim brojem 10) razmatraju se riječi koje se u literaturi ubrajaju u čestice a koje pokazuju određeni odnos prema kategoriji lica. Analizirane su sljedeće riječi i izrazi: *bîvā*, *bògami*, *bògati*, *bògdō*, *bògznā*, *bòjse*, *dāj*, *jè li (jè l’)*, *jèst*, *òvō*, *ònō*, *tō*, *òvāj*, *utolikō*, *žàlibože*, *hàjde*, *dè*, *nèmōj* te *èvo*, *èto* i *èno*. Nakon analize je potvrđeno da riječi i izrazi *bîvā*, *bògami*, *bògdō*, *bògznā*, *bòjse*, *dāj*, *jè li (jè l’)*, *jèst*, *utolikō*, *žàlibože* jesu čestice i da nemaju kategoriju lica. Riječ *bògati* može se smatrati česticom koja sadrži gramatičko značenje lica. Riječi *òvō*, *tō* i *ònō* u nekim su kontekstima zamjenice, a u nekim čestice. I u jednim i u drugim slučajevima sadrže značenje lica. Riječi *hàjde*, *dè* i *nèmōj* u nekim su slučajevima promjenljive i ponašaju se kao glagoli. U nekim su slučajevima nepromjenljive i ne pokazuju kategoriju lica. Tada ih treba smatrati česticama. Riječi *èvo*, *èto* i *èno* u nekim su slučajevima čestice, a u nekima prilozi. Uvijek pokazuju gramatičku kategoriju lica.

Radovi kojima se zamjenjuje mentorstvo na trećem ciklusu studija

2.9.

U radu "Prosti priložni junktori u bosanskom jeziku" (bibliografska jedinica ovdje označena kao II. naučni radovi pod rednim brojem 4) govori se o priložima koji mogu vršiti ulogu uvođenja zavisne klauze u sastav složene rečenice (*gdje, kad, kako, odakle, dokle, kamo...*) u bosanskom jeziku. U prvom dijelu rada prikazuje se kako je odnos priloga i veznika predstavljen u gramatičkoj literaturi i značajnijim rječnicima. Taj pregled pokazuje da u literaturi nije napravljeno jasno razgraničenje između priloga i veznika, premda se uglavnom priznaje da granica među njima postoji. U literaturi se može pronaći pet tipova nejasno predstavljenih odnosa između veznika i priloga: proglašavanje veznika vrstom priloga; proglašavanje priloga vrstom veznika ("nepravih veznika"); status "veznih sredstava" zaključnih i isključnih klauza; upotreba izraza "veznički prilog" i sl. te kategorijalni status odnosnih priloga. U radu je posebna pažnja posvećena riječima *gdje, kad* i *kako*, koje u nekim kontekstima zaista pripadaju priložima, a u nekim veznicima. Navode se sintaksički kriteriji na osnovu kojih se može dokazati kad su te riječi prilozima, a kad veznici. U radu se primjenjuje razlikovanje termina veznik, koji označava vrstu riječi, i termina junktor, koji označava vrstu funkcije u rečenici.

2.10.

Tema rada "Dvostruki distali *anamon* i *anamonaj* i srodni izrazi u bosanskom jeziku" (bibliografska jedinica ovdje označena kao II. naučni radovi pod rednim brojem 9) jesu riječi i konstrukcije sastavljene od distalnog priloga *anamo* i oblika ličnih zamjenica *on, ona...* ili distalnih pokaznih zamjenica *onaj, ona...* U bosanskom jeziku postoji veći broj takvih "dvostrukih distala", a među njima se ističu *anamòn, anamòna, anamònāj, anamònā* te *ànamo òn* i *ànamo ònaj*. Takvi se izrazi uglavnom ne bilježe u rječnicima i rijetko se koriste u pisanim tekstovima. Čak i govornici nerijetko pokazuju nesigurnost u vezi s njihovim promjenama, ali obično poznaju bar jedno od nekoliko značenja tih izraza ili znaju opisati primjerene kontekste u kojima se koriste. U radu se opisuju gramatičke osobine, značenja i pragmatičke odlike "dvostrukih distala" na osnovu podataka dobijenih putem korpusne i internetske pretrage te ankete sprovedene na 150 ispitanika. U primjerima su potvrđena sljedeća značenja "dvostrukih distala": 'šejtan, đavo, vrag, džin', 'drugost', 'mrska drugost', 'negativac', 'rak', a u nekim se slučajevima koristi kao "zaštitna formula" kojom se iskazuje želja da se zlo otkloni od govornika i prisutnih te ostane daleko od njih. Upotreba navedenih izraza skoro uvijek podrazumijeva negativan stav govornika prema onome što je označeno riječju *anamon* i sličnim izrazima. Upotrebom takvih izraza govornik u diskursu uspostavlja distancu između sebe i referenta – govornik smatra da je baš on po nekom osnovu (obično moralnom) superioran. Cilj (ilokucija) takvih govornih činova mogu biti različite vrijednosti, od blagog prijekora, preko umjerene kritike, do stroge osude.

2.11.

U radu "Elementi pučke pragmatike u bosanskim poslovicama" (bibliografska jedinica ovdje označena kao II. naučni radovi pod rednim brojem 12) razmatraju se stavovi o pragmatičkim temama eksplicitno spomenuti ili podrazumijevani u bosanskim narodnim poslovicama. Za potrebe istraživanja analizirane su tri zbirke poslovice: *Narodno blago* M. K. Ljubušaka (1887), *Na nebu paučina* V. Gunića (1999) i *Krajiške izreke i poslovice* A. Sijamhodžića (2017). U spomenutim je zbirkama zabilježeno mnogo poslovice koje tematiziraju pragmatičke teme. U središnjem dijelu rada navode se i komentiraju takve poslovice. One se najčešće odnose na učinke

upotrebe jezika, jezik kao znak karaktera i identiteta, primjerenost, indirektnost, učtivost, govorne činove (prvenstveno obećanja, savjete i komplimente) te saradnju (Griceovo načelo saradnje, njegove maksime i ograde). U poslovicama postoje implicitni i eksplicitni stavovi o komunikaciji i njenom značaju za organizaciju društvenog života ljudi. Prije svega, ukazuje se na činjenicu da je jezik djelovanje te da upotreba jezika može imati i pozitivne i negativne učinke; da je ono što ljudi govore znak njihova karaktera i identiteta; da je učtivost korisna, ali se ne treba izjednačavati s iskrenošću; da upotreba jezika može biti više ili manje primjerena i pravovremena; da je obećanje sveti dug, ali da se često ne ispunjava; da savjeti rijetko imaju učinka; da pohvale mogu iskvariti ljude; da je šutnja pohvalna, ali ne uvijek; da se mnogo laže, da se laži razotkrivaju i da je govorenje istine opasno. Značajan broj poslovice u potpunosti ili djelimično odražava Griceovo *načelo saradnje* ili neke njegove maksime. Pokazano je da su bosanske narodne poslovice bogat izvor za proučavanje pučke pragmatike. Spoznaje do kojih se došlo u ovom istraživanju mogu se dalje uspoređivati s elementima pučke pragmatike u drugim korpusima (drugim zbirkama bosanskih poslovice, aforizmima i autorskim dosjetcama, vicevima, zbirkama poslovice na drugim jezicima...) ili podacima do kojih se dolazi pomoću intervjua, upitnika i drugih tehnika elicitaracije. Podaci također mogu biti korisni za šira etnološka i sociološka istraživanja, rodne studije, kritičku diskursnu analizu i druge discipline.

III. MENTORSTVO

Nakon izbora u zvanje vanrednog profesora (2018) dr. Halid Bulić obavio je uspješno mentorstvo za četiri završna diplomatska rada na drugom ciklusu studija kandidata:

1. Aide Hasović: "Direktivi u dramskim obradama Hasanaginice", 2020. (<https://plus.cobiss.net/cobiss/bh/bs/bib/40637702#full>)
2. Adele Lihovac: "Pragmatička načela u naslovima štampanih i elektronskih informativnih medija", 2020. (<https://plus.cobiss.net/cobiss/bh/bs/bib/40607238#full>)
3. Amile Korić Begić: "Pragmatistička analiza drama Derviša Imamovića", 2020. (<https://plus.cobiss.net/cobiss/bh/bs/bib/40615174#full>)
4. Šejme Kamerić: "Upotreba glagolskih oblika u SMS porukama na bosanskom jeziku", 2024. (<https://plus.cobiss.net/cobiss/bh/bs/bib/ffsa/60761862>).

Dr. Halid Bulić iz objektivnih razloga na koje nije mogao utjecati nema uspješno obavljenog mentorstva na trećem ciklusu studija. Taj zakonom propisan uvjet za izbor u zvanje redovnog profesora kandidat je nadomjestio objavljivanjem tri dodatna naučna rada koji su navedeni i opisani u prethodnom odjeljku (II. Bibliografija, radovi 2.9, 2.10. i 2.11). Sva tri ta rada objavljena su u priznatim serijskim publikacijama koje su registrirane u relevantnim bibliografskim bazama.

IV. UČEŠĆE U PROJEKTIMA

Kandidat dr. Halid Bulić nakon izbora u zvanje vanrednog profesora (2018) učestvovao je u dvanaest domaćih i međunarodnih naučnih projekata, i to:

1. Okrugli sto "Šezdeset godina *Osnova strukturalne sintakse* Luciena Tesnière", Filozofski fakultet Univerziteta u Sarajevu, 4. 12. 2019. godine – voditelj projekta i predavač (tema: *Značaj učenja Luciena Tesnière i njegov odjek u bosnisticima*)

2. *Iconicity Atlas Project* (<http://www.iconicity-atlas.com/>, voditeljica Maria Flaksman /St. Petersburg State Electrotechnical University "LETI", St. Petersburg Institute of Foreign Languages; od 2021. godine Ludwig-Maximilians-Universität München/, koordinatorica Natalia Noland /Houston Community College/, od 2014. do danas), konsultant za bosanski jezik, 17. 11. 2020. godine
3. Međunarodna naučna konferencija *Sarajevski filološki susreti 6*, Bosansko filološko društvo, Sarajevo, 28.10. 2021. godine – predsjednik Organizacionog odbora
4. "O bosanskom na bosanskom", snimanje emisije "Pragmatika", Institut za jezik Univerziteta u Sarajevu i Televizija Sarajevo, novembar 2021, <https://www.youtube.com/watch?v=GxMsGo-gass>.
5. *Lingvazin*, magazin za jezik i književnost, Institut za bosanski jezik i književnost u Tuzli, od 2013. do danas (15 brojeva) – voditelj projekta (upravljanje, uređivanje, koordiniranje, logistika...)
6. Predavanja MMag.a Azre Hodžić-Kadić u okviru programa Dijaspore za razvoj (D4D) Ministarstva za ljudska prava i izbjeglice Bosne i Hercegovine i Vlade Švicarske uz *implementing partnere* UNDP BiH i IOM BiH, 2021. godine, Filozofski fakultet bio je institucija prijema, a prof. dr. Halid Bulić supervizor
7. Seminari za nastavnike bosanskog kao maternjeg jezika u dijaspori (šest seminara u toku 2021. i 2022. godine) u organizaciji Udruženja Otkrij bosanski (Beč), predavač
8. Serija lingvističkih predavanja ČOVJEK – JEZIK – SVIJET (2022), voditelj projekta
9. *Korpus SMS poruka na bosanskom jeziku* (2023), sakupljanje, klasifikacija i opis građe, izrada metodologije, dizajn, upravljanje projektom
10. *Rječnik bosanskih slivenica* (2023), sakupljanje, klasifikacija i opis građe, izrada metodologije, upravljanje projektom
11. Kurs metodike nastave bosanskog, hrvatskog i srpskog kao drugog i stranog jezika (2023/24), voditelj projekta
12. *Counteracting accent dIscrimination pRactiCes in Education* (CIRCE) (Italija, Njemačka, Bosna i Hercegovina, Portugal), konsultant (2024)

V. OSTALE AKTIVNOSTI I REFERENCE

Nastavnički rad

Dr. Halid Bulić ima dugogodišnje iskustvo rada u nastavi na univerzitetu. Osim Filozofskoga fakulteta Univerziteta u Sarajevu, na kojem je zaposlen od 2013. godine do 2018. u zvanju docenta, a potom od 2018. do danas u zvanju vanrednog profesora, predavao je ili je bio gostujuć predavač na nizu fakulteta u zemlji i inozemstvu, kao što su Filozofski fakulteti u Tuzli i Zenici te Univerzitet Humboldt u Berlinu, Univerzitet Adam Mickiewicz u Poznanju, Univerzitet Eötvös Loránd u Budimpešti, Univerzitet Karl Franzens u Grazu, Univerzitet u Regensburgu i Univerzitet "Alpen-Adria" u Klagenfurtu. Komisiji je poznato da je dr. Halid Bulić odličan nastavnik i da je za svoj nastavnički rad uvijek dobijao visoke ocjene i od svojih kolega i od studenata.

Učešće na naučnim skupovima

Dr. Halid Bulić kroz cijelu svoju dosadašnju akademsku karijeru bio je izuzetno aktivan. Učesnik je brojnih međunarodnih i domaćih naučnih konferencija, simpozija i seminara na

kojima je podnio referate Nakon izbora u zvanje vanrednog profesora (2018) učestvovao je na sljedećim takvim skupovima:

1. *Sarajevski filološki susreti 5*, Sarajevo, 20–22. septembar 2018. godine s referatom “Glagolski prilog trpni”
2. Naučno savjetovanje “Bosanski, hrvatski i srpski jezik i književnosti naroda Bosne i Hercegovine u školskom sistemu u Bosni i Hercegovini”, Ilidža, 6. april 2019. godine s referatom “Bosanski jezik treba biti samostalniji i vidljiviji nego do sada”
3. *53rd Annual meeting of Societas Linguistica Europaea*, od 26. augusta do 1. septembra 2020, online, bez referata
4. “*Kultura dijaloga i rod u jeziku*, seminar i radionice za profesore bosanskog jezika i književnosti”, Fondacija Heinrich Böll i Bosansko filološko društvo, Sarajevo, 22. i 29. 5. 2021. godine s predavanjem *Jezička tolerancija u komunikaciji*
5. *Sarajevski filološki susreti 6*, Sarajevo, 28. oktobar 2021. godine s referatom “Čestice i gramatička kategorija lica”
6. *Leksikografski postupak u različitim tipovima referentnih djela*, Sarajevo, ANUBiH, 27–28. maja 2022. godine s referatom “Leksikografski postupak u prvom rječniku bosanskih slivenica”
7. *Četrnaesti dani BHAAAS-a*, Tuzla, 3. 6. 2023, s referatom “Sarajevski korpus SMS poruka na bosanskom jeziku”
8. *Sarajevski filološki susreti 7*, Sarajevo, 26–27. oktobar 2023. godine s referatom “Teorijski okvir za opis upitnih jezičkih jedinica”

Uredničke i recenzentske aktivnosti

Kandidat dr. Halid Bulić ističe se i svojim uredničkim angažmanom. Tako je nakon izbora u zvanje vanrednog profesora (2018) uredio četiri knjige, i to:

1. Refik Bulić, *Bosanski pravopis*, Institut za bosanski jezik i književnost, Tuzla, 2022.
2. *Sarajevski filološki susreti 6* (knjiga 1), Sarajevo, 2022. (zajedno s Munirom Drkićem)
3. Halid Bulić, Elma Durmišević, Azra Hodžić-Čavkić, Enisa Bajraktarević, Azra Ahmetpahić-Peljto, Belmin Šabić, *Sarajevski korpus SMS poruka na bosanskom jeziku*, Univerzitet u Sarajevu – Filozofski fakultet, 2023.
4. “Zbornik radova u znak sjećanja na kolegicu Almu Granov”, Univerzitet u Sarajevu – Filozofski fakultet, 2024. (urednik za jezik)

Isto je tako vrlo aktivan u recenzentskom radu, te je između ostaloga od 2018. do danas recenzirao četiri knjige:

1. Azra Hodžić-Kadić, Manfred Luimpöck, *Otkrij bosanski 1 – Entdecke Bosnisch 1 – Discover Bosnian 1*, Weber, Wien
2. Zenaida Karavdić, *Bibliografija radova o bosanskom jeziku 1990–2020*, Univerzitet u Sarajevu, Institut za jezik, Sarajevo, 2021.
3. Lejla Tekešinović, *Strukture sa vezničkim izrazom comme si / kao da*, Filozofski fakultet Univerziteta u Sarajevu, 2022.
4. Aneta Naumoska i Nejla Kalajdžisalihović, *Introduction to Psycholinguistics: Selected Readings*, A. Naumoska, Skoplje, 2023.

Stručne aktivnosti i društveni angažman

Dr. Halid Bulić vrlo je aktivan u promoviranju struke te ima zapažen društveni angažman. Od aktivnosti kojima se bavio nakon izbora u zvanje vanrednog profesora (2018) ovdje treba spomenuti nastavak objavljivanja intervjua s poznatim lingvistima. Tako je u proteklih šest godina obavio i objavio sljedeće intervjue:

1. “Društveni mediji mogu se suprotstaviti rasizmu” (sagovornik Teun A. van Dijk, *Lingvazin* VII/1, decembar 2019, str. 19–20, https://izbjik.ba/Lingvazin/Lingvazin_VII-1_12_2019.pdf)
2. “Pisanje dobre definicije je poput pisanja dobre pjesme” (sagovornik John Considine, *Lingvazin* IX/1, oktobar 2021, str. 32–34, https://izbjik.ba/Lingvazin/Lingvazin_IX.1_10_2021.pdf)
3. “Koncepti emocija znatno se razlikuju u različitim jezicima” (sagovornica Anna Wierzbicka, *Lingvazin* IX/2, decembar 2021, str. 10–15, https://izbjik.ba/Lingvazin/Lingvazin_IX.2_12_2021.pdf)
4. “Nikada se nisam susreo s pojedinim jezikom koji nije imao da mi kaže nešto zanimljivo o jeziku kao pojavi” (sagovornik Bernard Comrie), *Lingvazin* X/1, decembar 2022, str. 15–19, https://izbjik.ba/Lingvazin/Lingvazin_X.1_12_2022.pdf);
5. “Dijalekti čuvaju vrijedne informacije o prošlosti” (sagovornik Marc L. Greenberg, *Lingvazin* XI/1, decembar 2023, str. 13–17, https://izbjik.ba/Lingvazin/Lingvazin_XI.1_12_2023.pdf).

Također je u proteklom periodu nakon izbora u zvanje vanrednog profesora preveo više naučnih i popularnih radova, i to:

1. Alexandra Y. Aikhenvald, “Magija imena: perspektiva terenskog istraživača (prvi dio)”, *Lingvazin* VI/1, juli 2018, str. 18–23.
2. Timothy Osborne, “Prevođenje Tesnièreovih *Éléments*”, *Lingvazin* VII/1, decembar 2019, str. 17–18.
3. Alva Dahl, “Razdvajanje glasova u literarnom izričaju: dijaloški pristup prezentaciji diskursa, gledište, fokalizacija – i interpunkcija”, *Lingvazin* VIII/1, decembar 2020, str. 6–12.
4. Maria Flaksman, “Iconicity Atlas Project: Baza podataka o onomatopejama u jezicima svijeta”, *Lingvazin* VIII/1, decembar 2020, str. 29–31.
5. Martin Haspelmath, “Svi smo mi strukturalisti”, *Lingvazin* IX/1, oktobar 2021, str. 35–39.
6. Martin Haspelmath, “Svi smo mi konstrukcionisti”, *Lingvazin* X/1, decembar 2022, str. 20–24.
7. Mija Michelizza, “Dan kada rječnici slave...”, *Lingvazin* XI/1, decembar 2023, str. 32–35.

Od 2020. godine dr. Halid Bulić uređuje *Blog Halid Bulić* (ISSN 2744-1326), dostupan na www.halidbulic.ba, na kome je objavio tridesetak stručnih članaka.

Od ostalih aktivnosti ovdje treba spomenuti brojne kandidatove nastupe u medijima koji se tiču bosnistike i općenito lingvistike te predavanja za učenike osnovnih i srednjih škola.

Dr. Halid Bulić veoma je zainteresiran za međunarodnu naučnu i stručnu saradnju, o čemu svjedoče i projekti u kojima učestvuje i zalaganje za osnaživanje veza s inozemnim kolegicama i

kolegama. U vezi s tim obavlja funkciju akademskog koordinatora za Erasmus+ ugovor između Filozofskog fakulteta Univerziteta u Sarajevu i Univerziteta "Alpe-Adria" u Klagenfurtu.

Nagrade i priznanja

Za svoj naučni rad dr. Halid Bulić dobio je više nagrada i priznanja. Za knjigu *Teme iz lingvističke bosnistike* dobio je nagradu *Hasan Kaimija* (2017), a nakon toga dobio je i sljedeće nagrade: Nagradu za najbolji udžbenik za visoko obrazovanje na Sarajevskom sajmu knjiga 2019. (za knjigu *Pragmatika* (koautorstvo sa Sabinom Bakšić, Bookline, Sarajevo, 2019)), Nagradu za nauku na 32. Međunarodnom sarajevskom sajmu knjiga i učila 2021. (za knjigu *Veznici u savremenom bosanskom jeziku*), Nagradu Univerziteta u Sarajevu za rezultate u naučnom / umjetničkom radu u 2020. godini i Priznanje za e-izdavaštvo i nove tehnologije na 35. Međunarodnom sarajevskom sajmu knjiga u aprilu 2024. godine (za e-knjigu *Sarajevski korpus SMS poruka na bosanskom jeziku*). Dobitnik je i društvenog priznanja Srebrna spomen-plaketa Grada Živinica (19. 6. 2023).

VI. ZAKLJUČAK S PRIJEDLOGOM

Nakon što je stekla potpuni uvid u prijavu i priloženu dokumentaciju kandidata dr. Halida Bulića, Komisija jednoglasno zaključuje da kandidat dr. Halid Bulić u potpunosti **ispunjava** sve potrebne i formalne i suštinske zakonom propisane uvjete za izbor u zvanje **redovnog profesora** za PODRUČJE (OBLAST): *HUMANISTIČKE NAUKE, POLJE: NAUKA O JEZIKU I KNJIŽEVNOSTI (FILOLOGIJA), GRANA: BOSNIKA, KROATISTIKA, SRBISTIKA, BOSANSKI, HRVATSKI I SRPSKI JEZIK, Lingvistika* (predmeti: *Uvod u lingvistiku, Pragmalingvistika / IP Pragmalingvistika, IP Umjetni jezici*), *Savremeni (standardni) jezik* (predmeti: *Morfologija I i II*), *OPĆI PREDMET(I) (Bosanski, Hrvatski, Srpski jezik 1 i 2)* na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu.

Komisija donosi ovakav zaključak imajući u vidu posebno sljedeće činjenice:

- prvo, dr. Halid Bulić proveo je cijeli izborni period u zvanju vanrednog profesora (u to zvanje izabran je 2018. godine), i to na oblasti za koju se bira;
- drugo, dr. Halid Bulić objavio je nakon izbora u zvanje vanrednog profesora šest knjiga, od kojih su u ovom izvještaju uzete u obzir i vrednovane dvije, i sve su iz oblasti za koju se bira;
- treće, dr. Halid Bulić nakon izbora u zvanje vanrednog profesora objavio je u priznatim publikacijama koje se nalaze u relevantnim bibliografskim bazama podataka petnaest naučnih radova, od kojih je ovdje uzeto u obzir i vrednovano jedanaest;
- četvrto, dr. Halid Bulić nakon izbora u zvanje vanrednog profesora uspješno je obavio četiri mentorstva za završne diplomske radove na drugom ciklusu studija;
- peto, dr. Halid Bulić objavio je nakon izbora u zvanje vanrednog profesora tri dodatna naučna rada u priznatim publikacijama koje se nalaze u relevantnim bibliografskim bazama kao zamjenu za mentorstvo na trećem ciklusu studija koje iz objektivnih razloga nije mogao obaviti;
- šesto, dr. Halid Bulić učestvovao je nakon izbora u zvanje vanrednog profesora u dvanaest domaćih i međunarodnih naučnih i stručnih projekata;
- sedmo, dr. Halid Bulić ima bogato iskustvo u naučnom i nastavničkom radu;
- osmo, dr. Halid Bulić vrlo je zapažen u svome stručnom i društvenom angažmanu.

Na osnovu temeljitog uvida u biografiju i bibliografiju dr. Halida Bulića, njegove ostale naučne i stručne reference te na osnovu dobrog poznavanja kandidata Komisija je nepodijeljenog




mišljenja da je riječ o istraživaču i nastavniku koji je već postigao izuzetno vrijedne rezultate u nauci i struci. Njegov dosadašnji naučni i stručni angažman sasvim jasno pokazuje kako je pred njim nastavak vrlo uspješne akademske karijere. Komisija dr. Halida Bulića ocjenjuje uzornim članom naše akademske zajednice. Zato je Komisija potpuno uvjerena u zaključak koji je iznijela ocjenjujući, i to ne samo sa zadovoljstvom nego i s punom naučnom i stručnom odgovornošću, da dr. Halid Bulić ispunjava sve potrebne formalne i suštinske uvjete za izbor u zvanje redovnog profesora.


PRIJEDLOG: Na temelju svega izloženoga Komisija predlaže Vijeću Filozofskoga fakulteta Univerziteta u Sarajevu da **izabere dr. Halida Bulića u zvanje redovnog profesora** za **PODRUČJE (OBLAST): HUMANISTIČKE NAUKE, POLJE: NAUKA O JEZIKU I KNJIŽEVNOSTI (FILOLOGIJA), GRANA: BOSNISTIKA, KROATISTIKA, SRBISTIKA, BOSANSKI, HRVATSKI I SRPSKI JEZIK, Lingvistika (predmeti: Uvod u lingvistiku, Pragmalingvistika / IP Pragmalingvistika, IP Umjetni jezici), Savremeni (standardni) jezik (predmeti: Morfologija I i II), OPĆI PREDMET(I) (Bosanski, Hrvatski, Srpski jezik 1 i 2)** na Odsjeku za bosanski, hrvatski i srpski jezik Filozofskoga fakulteta Univerziteta u Sarajevu.

Sastavni je dio ovog izvještaja akt Filozofskoga fakulteta Univerziteta u Sarajevu br. 03-02/676, od 12. 9. 2024. godine.

Sarajevo, 17. 9. 2024. godine

KOMISIJA

1. 
Prof. dr. Ismail Palić, predsjednik
2. 
Prof. dr. Lejla Nakaš, član
3. 
Prof. emer. dr. Josip Baotić, član



Za
